

Communicaziun a las medias dal Cussegl dal public SRG.R

Dal «Nuovo» enfin ad emissiuns cumprovas

Mustér, ils 04-05-2017 – En sia segunda seduta dal 2017 ha il Cussegl dal public SRG.R discussiunà fundadamain las trais emissiuns Marella, Minisguard e las contribuziuns dad RTR durant il campinadi mundial da skis alpin a San Murezzan. Las prestaziuns han persvadì.

Plinavant è era la nova furma d'infurmaziun «Nouvo» stada in tema. Cun mintgamai in filmin d'ina minuta infurmescha RTR davart ina novitad centrala quotidiana. Quella vegn derasada en la rait ed en spezial via medias socialas.

Cun l'entschatta matg remplazza Sandra Carisch-Killias l'Anna Maria Ratti sco manadra dal post da la SRG.R. Ad Anna Maria Ratti admetta il Cussegl dal public SRG.R in grond engraziament per ses grond engaschi e sia buna lavur.

Campinadi mundial da skis alpin a San Murezzan

Davent dals 6 enfin ils 19 da favrer è stà en l'Engiadina il campinadi mundial da skis 2017. RTR ha fatg part e rapportà da las cursas e dal mintgadi en il lieu da las occurrenzas sportivas. La gruppa da lavur observanta dal Cussegl dal public ha mess ses focus en spezial sin duas chaussas: emitter contribuziuns cun il focus da l'atmosfera e dar in sguard davos las culissas cun vuschs indigenas. La conclusiun dal rapport da la gruppa è ordvart positiva. Igl è reussì ad RTR da cuntanscher las finamiras tschentadas. En spezial ils commentaders da las emissiuns live han prestà lavur fitg professiunala. Persvadì han plinavant las differentas contribuziuns e survistas online ed era las emissiuns a la televisiun davart questa tematica en il Telesguard ed en ils Cuntrasts. D'avair il studio amez San Murezzan e franc stà in avantatg, gist en vista dal contact cun la gliעד indigena. La «Uorschla Cranzla» perencunter n'è betg adina stada chapaivla cun sias lamentaschuns memia spertas.

Marellas sut la marella

Durant ils mais da favrer e mars èn tschintg Marellas vegnidas dilucidadas: dus Tavulins litterars «Omlettas deliziusas ed uras precisas» e «La narradad tut normala dil mintgadi, e lura las Marellas: «Zauberberg 2.0 – è il burn-out la nova tuberculosa?», «Matta – pajar! – Vita d'ustiers», e «...e sin dumengia fai bel – nus e noss'aura!». Ils puncts centrals da quest'observaziun èn stadas las finamiras tschentadas dad RTR sez per quell'emissiun: dar in sguard davos las culissas en il mintgadi cun approfondar in tema e tscherner temas che fan part da noss mintgadi actual e che sveglian marveglias sin divers aspects da la moda da viver. Il scopo da las emissiuns pli lungas dal Radio Rumantsch (da 30 e dapli minutas) è la reflexiun, il cumparegliar nov e vegl, enconuschent e nunenconuschent, il nunitsà. La gruppa da lavur è persvadida che las finamiras tschentadas vegnan cuntanschidas en ina moda e maniera d'aut nivel. La

gruppa vegn a l'invista che, cunzunt las trais emissiuns cun in tema specific piztgan mintgatant, carmalan, sveglian marveglias, fan punts en noss mintgadi, dattan sguards davos las culissas e lian l'auditori da far in nov viadi da scuverta, d'activar il kino en il chau. Central per in bun gartegiar da questas finamiras è ina buna lavur da redacziun e moderaziun, quai ch'è ademplì cumplainamain en las emissiuns prendidas sut la marella. Eventualmain dessi, tenor la gruppa observanta, ina pussaivladad da variar la moda e maniera dils tavulins per betg adina far diever dal medem setting.

Bunas notas per il Minisguard

Gia per la segunda giada entaifer ils davos onns è il Cussegl dal public SRG.R sa fatschentà da l'emissiun per giuvenils da TvR, il Minisguard. Era questa giada han las var diesch emissiuns observadas ils mais favrer e mars pudì persvader. Minisguard n'è betg mo in'emissiun per giuvenils tranter 7 e 17 onns, era glied creschida s'infurmescha entras questa purschida. Temas ch'èn per il pli actuals vegnan tractads mintgamai la sonda en l'emissiun da bundant 10 minutas. La gruppa da lavur è da l'opiniun ch'il Minisguard na duess betg tractar memia blers differents temas en quest curt interval. Pli pauc vala mintgatant dapli e dat dapli profunditad. Las moderaziuns èn frestgas, simpaticas, cumpetentas e lian ils uffants cun dar sustegn d'orientaziun e sustegn moral. Anc adina d'in fitg aut nivel èn las graficas e visualisaziuns en il studio ed entaifer las singulas emissiuns. Las pussaivladads online per ils giuvenils dastgassan vegnir amplifitgadas, propagadas e preschentadas a moda anc pli favuraivla.

IN SGUARD EN IL FUTUR

Sco lavur da gruppa per la seduta dals 13 da settember 2017 èn vegnids tschernids trais temas: Profil – RR, Sil punct – TvR e las novitads regiunalas online. Quellas trais chaussas vegnan puspè prendidas sut la marella cun dumondas specificas. Plinavant vegn il Cussegl dal public SRG.R a sa fatschentar detagliadamain cun il program da radio durant la stad vegninta.

Entschatta matg èn las cifras da la SRG.SSR vegnidas publitgadas. RTR dastga esser losch sin il cuntanschì. Da 10 RumantschAs taidlan 7 RTR e quai 137 minutas a di. En cumparegliaziun cun SRF (115 minutas) in fitg legraivel fatg. Era las emissiuns da TvR han pudì consolidar, gea schizunt augmentar lur public. Telesguard miran 30'000, Cuntrasts e Minisguard 40'000 aspectaturAs. In augment dal public hai era dà tar Battaporta, 60 pertschient da las personas interrogadas enconuschan questa purschida online per ils giuvenils.

Tuttas emissiuns observadas èn da chattar sin www.rtr.ch.

Infurmaziuns davart il cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79